

Inatsimmut siunnersuummut oqaaseqaatit

Oqaaseqaatit nalinginnaasut

1. Inatsimmut siunnersuutip tunuliaqutaa

Inatsisartut 2009-mi ukiakkut ataatsimiinneranni amerlanerussuteqartut akuersissutigaat akileraarpallaarutit utertinneqarnerannut atatillugu erniat 4 procentiniit 2 procentinut appartinneqassasoq, takuuk UKA 2009/138.

Inatsimmut siunnersuut aalajangiinerup tamatuma kinguneraa.

Maannamut Skatterådip aalajangigai Nunatta Eqqartuussivianut suliarineqaqqaarfittut suliaassiissutigineqarsinnaapput. Kalaallit Nunaanni eqqartuussisarneq pillugu inatsisip nutaap atuutilerneratigut suliat suliarineqaqqaarfiat nutaq eqqunneqarpoq; Kalaallit Nunaanni Eqqartuussivik. Tamatumunnga peqatigitillugu Nunatta eqqartuussiviani suliaassat allanngortinneqarput, taamaasilluni nunatta eqqartuussiviata suliareqqitassanngortitsivittut maanna suliat kredsrettimi imaluunniit Kalaallit Nunaanni Eqqartuussivimmi suliarineqaqqaarfittut suliaasimasut suliarisassallugit. Inatsimmut siunnersuummi siunnerfigineqarportaaq tamatumuuna eqqartuussiveqarnerup aqqissuussaanerata allanngorneranik pilersitaasoq naleqqussaaffigineqarnissaa.

2. Inatsimmut siunnersuutip imarisai

Inatsimmut siunnersuutip kinguneraa akileraarpallaarutininut utertoortisianit erniarititaasoq 4 procentiniit 2 procentinut appartinneqarnissaa ukiumi aningaasarsiorfiusumi 2009-imut utertoortisiat tunniunneqarneranniit atuutilersumik.

Siunnersuutigineqarpoq Skatterådip aalajangiineri Kalaallit Nunaanni Eqqartuussivimmut suliarineqaqqaarfittut suliaassiissutigineqarsinnaanissaat.

Tamatumalu saniatigut siunnersuutigineqarpoq Inatsisartut inatsisaanni oqaatsit atorneqartut Namminersorluni Oqartussaannermut ikaarsaariarnerup kingunerisaanik allanngortinneqassasut.

3. Aningaasatigut allaffissornikkullu pisortanut sunniutissat

Siunnersuutip nunatta karsianut ukiumut 3 mio. koruunit missigisaannik sipaarutaanissaa ilimagineqarpoq.

4. Aningaasatigut allaffissornikkullu inuussutissarsiuteqartunut sunniutissat

Siunnersuutip inuussutissarsiuteqartunut aningaasatigut allaffissornikkullu sunniuteqarnissaa ilimagineqanngilaq.

5. Avatangiisinut pinngortitamullu sunniutissat

Siunnersuut avatangiisinut pinngortitamullu sunniuteqartussaangilaq

6. Aningaasatigut allaffissornikkullu innuttaasunut sunniutissat

Siunnersuut innuttaasut aningaasanik atorsinnaasaannik ukiumut 3 mio. koruuninik ikileriartitsinissaa naatsorsuutigineqarpoq.

Siunnersuut innuttaasunut allaffissornikkut sunniuteqarnissaa naatsorsuutigineqanngilaq.

7. Naalagaaffeqatigiinnermut namminersornermullu tunngasut

Inatsimmut siunnersuut naalagaaffeqatigiinnermut attuumassuteqanngilaq.

8. Oqartussaasunut kattuffinnullu tusarniaaneq

Siunnersuut tusarniaassutigineqarsimavoq ukununnga:

KANUKOKA, Kalaallit Nunaanni sulisitsisut Peqatigiiffiat , Nunaqavissut Suliffiutillit Kattuffiat (NUSUKA), Sulinermik Inuussutissarsiuteqartut Kattuffiat (SIK), KNAPK, Aningaasaqarnermut Naalackersuisoqarfik, Inuussutissarsiornermut Suliffeqarnermullu Naalackersuisoqarfik aamma Isumaginninnermut Naalackersuisoqarfik aamma Peqqissutsimut Naalackersuisoqarfik.

Tusarniaanermut akissutit tiguneqarsimapput KANUKOKA-mit , SIK-mit aammalu Peqqissutsimut Naalackersuisoqarfimmit.

KANUKOKA isumaqarpoq erniaqartitsinermi annertussutsip allannortinnissaa siunissamut sammitinneqartariaqartoq, innuttaasut 2009-mi akileraarpallaarutinit

utertoortisiassa 4 procentinik erniaqartinneqarnissaannut ilimasussallutik pissutissaqarmata.

Tamatumunnga oqaatigineqassaaq Naalakkersuisut pingaartissimammassuk ukioq manna aningaasatigut naatsorsuiffiusumi sipaaruteqartoqareersimanissaa.

SIK aamma Peqqissutsimut Naalakkersuisoqarfik siunnersuummut tunngatillugu oqaaseqaateqarsimangillat.

Inatsimmut siunnersuummi aalajangersakkanut ataasiakkaanut oqaaseqaatit

§ 1-imut

Nr. 1-imut.

Siunnersuutigineqarpoq akileraarpallaarutinut utertoortisiat erniat 4 procentiniik 2 procentinut appartinneqassasoq.

Nr. 2-mut.

Siunnersuutigineqarpoq sulianut Skatterådimut suliassiissutigineqarsimasunut tunngasut suliarineqaaqarfiusutut eqqartuussinikkut aalajangiisinnaaneq Kalaallit Nunaanni Eqqartuussivimmumut inissinneqassasoq.

Nr. 3-6-imut

Namminersorluni Oqartussaannermut ikaarsaariarnerup kingunerisaanik Inatsisartut inatsisaanni oqaatsit atorneqartut allannortinneqassasut siunnersuutigineqarpoq.

§ 2-imut

Siunnersuutigineqarpoq inatsit 1. juni 2010-mi atuutilissasoq utertoortisianillu § 25, imm. 2-mi appartitsineq, ukiumi aningaasarsiorfiusumi 2009-mi akileraarpallaarutinut utertoortisiat utertinneqarneranniit atuutillerluni.